

**Lise** Que j'voudrais aver de biaux habits comme chenna.

**M-D-L-C** *(À Lise.)*  
Allons file hors d'ichin.  
*(Lise traine aussi longtemps comme ou' peut.)*  
Ach't'heu Héléne tch'est que chen-chin veurt dithe?

**Héléne** En v'la assez Rachelle. Toute ta vie tu as fait de tan mus de'm c'mander, mais les choses ont changi. *(Avec ordgi.)* Je sis eune autre personne.

**M-D-L-C** Ch'est bein évident – ta fache peinte, tes g'veux teints et frisés, tu pathais affreuse et t'infecte à [MISSING TEXT]

**M-D-L-C** Tchi horreur – ta grise tête – teinte rouage.

**Héléne** Madame Claudine m'a dit que ch'est la draine mode.

**M-D-L-C** Madame Claudine!!!

**Héléne** La dame qu'est responsablye pour ma transformation et ou' m'a r'c'mandé de rithe tout l'temps pour m'ê r'janni.

**M-D-L-C** Ch'est abominablye de vaie eune femme de t'n âge faithe eune bête de lyi-même. Et pis ou èque tu'as té pêtchi les sous pour payi pour tout chenna?

**Héléne** Ch'est man secret chenna.

**M-D-L-C** Pourtchi gas-pilly des sous sans raison?

**Héléne** Ch'est des sous bein dépensés – quand tu pense que j'passe pour 50 ans et quand j'm'en v'nais ichin y'a des gars qu'ont soufflyie quand l' m'ont veue.

**M-D-L-C** Tu devthais rouagi d'honte de pâsler d'la sorte. Tu'n gagne rein, tu t'en vas prendre 70 demain!

**Héléne** Véthe, mais 50 est m'n âge à l'avnin, mais si tu viyais ma belle bliue robe en v'leur pour des occasions spéciales au sé, comme quand j'm'en vais dîner auve un bieau monsieu'.